

# Profet Sefanaiago Po Aseai Buku

## Hasia nedabo po

Sefanaia agai profet po polobadu gana pusai dao, te king Josaiago te Juda dabego dwai kolesaga augwaligo augwa lotu wabode dodolali sogo pusai dao. (2 Kin Daj 22 me 23de suo.) Sefanaia agai Juda hanibolo agai augwaligo te dolo meni yai kolesaga tagala po walai dao. Tialima meni yani da, teda Godigo genuai sege augwaliba tagala palaibao.

Sefanaiago te po me pusali, te meba kantri we bidi dabego Juda dabe dali boi bidi yali we bidibolo me dene mawaibao po wali. Jerusalem me dolaibao. Tiali goli, te we bidi, augwali homu begelama, tama augwali doloba pai kolesaga wali pai we bidi augwali da bugagia bidaibao. Tama nosali te Jerusalem bugagia ma pedelaibao, tama te doloba pai we bidi augwali tede bidaibao.

---

## Genuai Bidigo bubuga pedelaibao

*(Daj 1-3)*

### Te Genuai Bidigo bubugade agai te we bidi po tu ela mawaibao

**1** Te Josaiago, te Emongo ogwa, aga te Juda hani we bidigo king bidali sogo, te sogo Genuai Bidi Godigo e po Sefanaiabolo pusa mawai dao. Sefanaia aga te king Hesekia hani kanemedede pedelai bidi dao. Kusi te Sefanaiago aya dao, tama Gedalia te Kusigo aya dao, tama Amaria te Gedaliago aya dao, tama Hesekia te Amariago aya dao.<sup>a</sup>

<sup>2</sup>Te Genuai Bidigo Sefanaiabolo e tama tiwai po walalio, “Eno tigidali tode elalubo nai dabe mu dolaio. <sup>3</sup>Te da, te tigidali bidi dabe, me hasa dabe, me ba dabe, me sugu dabe, sese tama dao. Tama eno te we bidi tigidali dwai se emainu ebo nai dabe sese tama silaibao. Te eno tigidali tode we bidi sese tama dola silaibao, tama deli me bidigobeo. Ena Genuai Bidi, eno po polo walio.”

---

<sup>a</sup> 1:1 2 Kin 22:1–23:30; 2 Sto 34:1–35:27

<sup>4</sup>“Eno te Juda t̄o pedai we bidi, me Jerusalem hanu we bidi dene mawaibao. Tama teyu, eno te tibo god Balba lotu wabo nai dabe sese tama doliyu, me Balgo tigidali pris dabe sese tama doliyu yaibao. Tama te we bidi dabego augwali munu me ma homu kone egobeo. <sup>5</sup>Te eno te we bidi augwali augwa wiegi yai dolaba pai be peduba pelama, tama augwaligo te polua, me giliga, me h̄o dabeba lotu wabo we bidi me dolaibao. Mu tama, we bidi hauwa augwaligo enaba lotu po weyu, e tama po wabo, ‘Mu tamao, dago Genuai Bidi wali pobao,’ po wabo dao. Tiali goli, augwaligo tibo god Molekba lotu wagi peyu, me augwaligo te po ‘Te mu tama,’ po wabo dao, ‘dago god Molek wali pobao,’ po wabo dao. Tialima, eno augwali dolaibao. <sup>6</sup>Te we bidi augwaligo ena tudi ola menama, tama ena wali me asis̄ama iyu, tama enabolo augwali dodolomainu hanalubo menio. Te eno te we bidi augwali me dolaibao,” Genuai Bidigo te po wai.

<sup>7</sup>Tigidali Nai Tonalubo Genuai Bidi Godigo bubuga p̄aba polo yagasalio. Tialima, dage aga pageba aselama, tama pedauwali pania selama elalua. Genuai Bidigo aga we bidi elabo dola selama elalubao, te bidi dabego ofa ebo hasa dabe elebo tiwai yaibao. Tama agai meba bidi dabe i wali, te agai ebo ş̄e dabe suagasomainu. Tama agai augwalibolo agai gedude wiegi yai pedalobo kolesaga emainu yao po wali.

<sup>8</sup>Genuai Bidigo e tama po wali, “Te eno ena te we bidi ela wialobo bubugade, te eno te kingo ofisa dabe dene mayu, me te kingo wai ogwa dabebolo, me te bulu badu dwai kolesaga wali pabo bidi sese tama dene mena silaibao. <sup>9</sup>Te eno te we bidi augwali te bulu badu we bidigo lotu wabo tiwai ebo we bidi, me nai wi siyu, me bidi ela muyu ebo we bidi sese dene mayu, me te nai wi sai nai dabego augwa genuai bidigo be p̄aḡaniyu ebo bidi dabebolo dene mawaibao,” wali.

<sup>10</sup>Genuai Bidigo te po wali, “Te bubugade dagego te we bidi augwali te Jerusalem sunumi obo p̄ade dolalubo suaibao. Augwaligo te Şuḡuḡo Sunumi wabo, tede tama dagego augwali gela wabo po odaibao. Te dagego te Jerusalemgo Niu Taun we bidigo gela odaibao. Tama dagego mage nai me bulu dude bomonama mu kulukulu wabo odaibao. <sup>11</sup>Te dage te taunde odogo malu bulude bidiyu, te po dabe odobaso da, teda dage gela waibao. Magi baso meni, dagego duga tigidali bisnis bidi dabe isai subaso,” te po wai.

<sup>12</sup>“Tama te sogo eno lam selama, tama ena Jerusalem tomoba pelama, tama eno te bidi dabe eno kolesaga godolo is̄ama ebo bidi dabe bugagia gegegi paibao. Augwaligo homu augwa digi tigidali ş̄e yaibao homu ebao. Tiali goli, menio. Augwaligo te po wali, ‘God da, olo bidibo dao,’ po wali. ‘Agai wiegi yai bidi dabe tau selama, tama agai dwai bidi dabebolo dwai pe mabeo. Tialima, aga tagalao,’ wali. Tialima, eno te bidi dabe augwali dolaibao. <sup>13</sup>Te boi bidi dabego te bage augwaligo nai dabe wi saibao,

tama augwaligo be dabe dolaibao. Augwaligo gesi be dabe şe yai goli, augwali te be dabede bidigobeo. Te augwaligo ni wain bulaiba, tiali goli augwaligo te ni du sogobeo, tama augwaligo te wain we me geselegobeo,” Genuai Bidigo te po wai.

<sup>14</sup>Genuai Bidigo agai po tu yabo te bubuga te pađe dao, tama te sogo pađe polo pedelaibao. Te dwai bubugade da, te bomai ami bidi dabe tagalao, augwali me wi dwai mu elama, tama gela geninama mu waibao. <sup>15</sup>Tama te sogo Genuai Bidigo moni şeşe pebeli diliba mu pedelaibao, tama te we bidigo homu şeşe elama, tama augwaligo homu dwai yaibao, tama te nai dabe sese tama dola silaibao. Tama te pş dabego giliga halua siyu, te dwai ti be elama, tama geninama mu hulua saibao. <sup>16</sup>Tama te bubugade te biugel bu weyu, me te ami bidi dabego hae weyu yaibao, te augwaligo te bomai obo elalubo taun obo aluyu, me te tonalubo bidi wasman dabego bobobage be dabe aluyu yaibao.

<sup>17</sup>Genuai Bidigo e tama po wali, “Te tşde we bidi dabego ena Genuai Bidi dali dwai şe yalio. Tama tibaso, eno haniani dwai dene augwalide pedelemainu ilama, tama augwali te gedu widai bidi dabego sunumi gege bilibo tiwai bilaibao, tiali goli te wi pabo tu menio. Tama augwaligo kaneme te we tiwai gelama, tama augwali isaibao. Tama augwaligo tigi dabe te tşde te yowi di danamu pabo tiwai damuaibao,” Genuai Bidigo te po wai.

<sup>18</sup>Tama te bubugade Genuai Bidigo şeşe hania haninama, mu suaibao. Tama augwaligo silva me gol dabego augwali tau me sogobeo. Mu menio. Genuai Bidigo şeşe te dwai isi tiwai pedelama, tama tigidali tş dela silaibao. Tama deli sogo tama agai tşde we bidi sese tama mu silaibao.

### We bidi augwaligo homu kolesaga begelemainu yao

**2** <sup>1</sup>Dage e kantri we bidi, dage deliba sisinao. Dagego duga dwai kolesagade dage hale dwasianu me ebo menio. Dagego homu bugagia kone palama, tama te dwai kolesagade hale iyao. <sup>2</sup>Tiyu, Godigo aga homu şeşe haniniyu, dage deli sogo tama te plaua sasia pabo tiwai elama dolidali weyu iyao. Tiyu, Genuai Bidigo şeş yagasiyu, dage isi ulubo tiwai elama ulidali weyu iyao.

<sup>3</sup>Dage we bidi hamaga isanama Genuai Bidigo po sela şasiama ebo we bidi, dage agaba asişo. Dagego duga digi aiyaba elaluama, tama doloba pai kolesaga naga iyao. Tialima, dagego te tama tiyu da, teda Genuai Bidigo şeşe elama, tama te dwai pe te dwai we bidi dabebolo wei ponobo sogo dage da dologobeo.

### Genuai Bidigo Juda bulu pađe elalubo kantri dabe dolaibao

<sup>4</sup>Te Genuai Bidigo te kantri Filistia dolobo sogo, te taun Gasade bidi deli me bidigobeo. Me te taun Askelonde me bidi meni yaibao. Te boi bidi

dabego taun Asdot we bidi sese tama deli be posobo sogo sela şawaibao, tama augwaligo te taun Ekron we bidi me sela şawaibao.

<sup>5</sup>Tega, dage Kenan tşde bidibo Filistia dabe, nambisde bidibo Keret bage, dage me dolaibao! Genuai Bidigo dage po tş ela mawai dao. Tama agai dage dolama, tama bidi deli me bidigobeo. <sup>6</sup>Dagego tş dage te tamu aş sabide te elalubao, teda te olo kala bulu pedelaibao. Tama te sipsip tonalubo bidi dabego tede dwasianu be dabe me sipsip obo te pesagede ş eyu yaibao. <sup>7</sup>Tama te dwasianu Juda hani augwali dolişama yali, te bage augwaligo dagego tş saibao. Tama augwaligo sipsip kibu dabego tede nai tulama, tama te Juda dabe augwali te Askelon taun bede piyu yaibao. Tama God augwa Genuai Bidi, augwa Juda dabego Genuai Bidi augwali dali bidiyu, tama agai augwali augwa kantride bugagia bidimainu ilaibao.<sup>b</sup>

<sup>8</sup>Genuai Bidi Tigidali Bomo Elalubo Bidigo te tama po wali, “Te kantri Moap me kantri Amon bidi dabego eno we bidi posobo po olama, tama eno we bidi dali dwai po wabo eno polo odalio. Tama augwaligo hae olama, te po wali, ‘Augwaligo tş dago saibao,’ po wali. <sup>9</sup>Mu tamao, ena Tigidali Bomo Elalubo Genuai Bidi ena bidalubao. Ena Israel dabego God, eno mu po weyu, te daş obao. Te Moap dabe, me Amon dabe, augwali te taun Sodom de Gomora si dolali tiwai tama yaibao. Tama hae naga holama, tama augwaligo tş mesega saibao. Tama tamu sabo dedage dabe naga pedelama, tama te bulu dolama, te tama elaluaibao. Eno hani augwali me bidali da, te bidi dabe augwaligo augwali dali hwınama, tama augwaligo nai dabe kegelama saibao, tama augwaligo tş me saibao,” te po wai.<sup>c</sup>

<sup>10</sup>Te tama tiwai ş te Godigo te Moap dabe me Amon dabe dali me dene mawaibao. Magi baso meni. Augwaligo hamaga elama, tobolu gagea peyu ebo dao. Tama augwaligo Genuai Bidi Tigidali Bomo Elalubo Bidigo we bidi dabe dali dwai po wabo dao. <sup>11</sup>Genuai Bidigo augwali wi dwai mu emainu ilaibao. Te agai te tigidali kantri dabego tibo god dabe olo nai pedelemainu ilaibao. Tama tigidali tş we bidi augwali augwa kantride bidiyu, Genuai Bidiba naga lotu po weyu yaibao.<sup>d</sup>

<sup>12</sup>Dage kantri Kus we bidi, Genuai Bidigo dage boide ela muna silaibao.<sup>e f</sup>

<sup>13</sup>Tama aga bomogo naga Genuai Bidigo te kantri Asiria we bidi dola silaibao. Te kantri te not badu te elalubao. Tama agai augwaligo genuai taun Ninive dolaibao. Tama te taun te olo nai meni yai olo tş wa pai bulu

<sup>b</sup> 2:7 Ais 14:29-31; Jer 47:1-7; Ese 25:15-17; Jol 3:4-8; Amo 1:6-8; Sek 9:5-7

<sup>c</sup> 2:9 Gag 19:24    <sup>d</sup> 2:11 Ais 15:1-16:14; 25:10-12; Jer 48:1-47; 49:1-6; Ese 21:28-32; 25:1-11; Amo 1:13-15    <sup>e</sup> 2:12 Te tş kantri nogi augwaligo polobadu wali Kus, megi dago te nogi Sudan wabo dao.    <sup>f</sup> 2:12 Ais 18:1-7

elaluaibao, tama bidi te bulude me bidigobeo. <sup>14</sup>Te kau kibu dabe, me sipsip kibu dabe, me meme kibu dabe, me bulu hasa dabe naga, augwali teba piagasiyu yaibao. Magi baso meni, te boi bidi dabego te wiegi yai ni bq name dabe dadalama, buluba şaşawaibao. Tama te hulide bilalobo ba dabe augwali te bede bidaibao. Tama augwali te windo dabede dualama, te augwa po weyu yaibao.

<sup>15</sup>Te Ninive dabe augwaligo homugo augwali bomai bage dao homu elama, tama augwaligo homu augwali bidi dabego me dologobeo homu ebao. Tama tiyu, augwali wiegi yai homu pemene ebao. Tama augwaligo homugo augwaligo taun te hasia polalubo taun dao homu ebao, te tigidali kantri tomode. Tiali goli, mu menio. Te dwai nai dabe te Ninivede pedelaibao. Tama te bulu dolama, tama elaluaibao. Tama te bulu te bulu hasa dabego bulu gagawaibao. Te bidi dabe sese augwali te paşa pabo bage augwaligo posobo po weyu, eda ma kila siyu yaibao.<sup>ş</sup>

### Genuai Bidigo Jerusalem dabego şeşe sela şawani

**3** <sup>1</sup>Jerusalem, hobede ya, nage dolaibao, nago kolesaga Genuai Bidigo gedude dwai damua pai mu yalio. Nagede bidibo we bidi dabe augwaligo agai po sela şabo dao. Tama augwaligo augwa hasi deli hani dali dwai şe ebo dao. <sup>2</sup>Augwaligo bidi dabego po odisawai, awe, augwaligo Genuai Bidigo po me odai menio. Tama augwaligo Genuai Bidigo augwali dodolomainu homu ebo hagela yai dao. Tama augwaligo agaba homu daş olama, tama augwaligo Genuai Bidigo augwali tau somainu me hanalu wai menio. <sup>3</sup>Te Jerusalem genuai bidi dabe augwaligo te olo we bidi dali dwai kolesaga ebode augwali te bulu laion sibi nasi ebaso bomona daş wabo tiwai ebo dao. Tama te po tu odobo bidi dabe, augwali te uni yowi nasi genuai ebo tiwai iyu ebo dao. Tama augwaligo te hasa tulama, silama, tama augwaligo do tuabo dili me mubeo. <sup>4</sup>Te profet dabe augwaligo augwa şe subigila eyu, bugagia ebo meni, tama augwaligo te bidi dabe augwali dolomainu ili po naga ola mayu ebo dao. Tama te pris dabe augwaligo te Godigo tedali gasagi yai be habu dabede dwai şe eyu ebo dao. Tama augwaligo Godigo bomai po hasegelama tagalali, te augwa digi augwa ma tau somainu.

<sup>5</sup>Tiali goli, Genuai Bidi Jerusalemde me bididuali. Agai doloba pai kolesaga naga ebo dao. Te agai dolo isawai kolesaga da agai me ebo menio. Mu menio. Te tigidali sogo bubugade agai te we bidi dabe dali doloba pai po tu naga ebo dao. Agai te şe tagalobo menio. Tiali goli, te taunde bidibo dwai bidi dabego te dolo meni yai kolesaga naga ebo dao. Tama augwali tede hale dwasianu me ebeo. Mu menio.

<sup>6</sup>Genuai Bidigo e tama po obao, “Eno meba kantri dabe mu silama, te Juda hani isawai bage, tama augwaligo genuai taun dabe dolama tagalai

ş 2:15 Ais 10:5-34; 14:24-27; Nah 1:1-3:19

dao. Tama te bomai obo dabe me, be dabe me, te boi bidi tonaluyu no munalubo te sigide elalubo be dabe dolama, tagalai elalubao. Tama te bidi dabe augwali te taun sunumidu tomodu bidi dabe me bilibeo. Magi baso meni. Bidi deli me bidisąma ebaso. <sup>7</sup>Eno homugo te eno we bidi dabe augwaligo eno te kolesaga sulama, tama augwali ena dologode bidigowe homu yali, tama eno augwali dodolomainu sula tagalogowe homu yali. Tialima, augwaligo eno augwalibolo polobadu ola mani nai dabe bugagia koneyu da, teda eno augwali me dologobeo. Me eno augwaliba dwai dene magi menigi da. Tiali goli, augwaligo eno ola mani po odobeo. Menio. Deli sogo tama augwali hogodama, tama augwaligo bomonama, augwa polobadu yali dwai kolesaga edelama mu yalio,” te po obao.

<sup>8</sup>Tialima, Genuai Bidigo aga wali asobo we bidibolo e tama po walali, “Dage homu hauwa igimio. Dagego eno te tigidali kantri we bidi po tų ela mabo te sogo deli naga tonaluiagameo. Magi baso meni. Eno augwali dali şębę elama, tama eno augwali deliba sisinagasomai elama, homu polo daų olama, tama eno augwali dene mawaibao. Tama eno şębę te isi bogoli tiwai elama, tama eno tigidali tų dabe mu dolaibao,” wali.

<sup>9</sup>“Tama te sogo eno tigidali kantride we bidigo homu kolesaga hasesegele paibao. Augwaligo homu kolesaga gesi ma elama, tama augwaligo ena deliba naga gedu haluasa po weyu yaibao. Tama augwali homu deli naga elama, tama augwaligo eno po wali asaibao. <sup>10</sup>Tama eno we bidi dabe augwali eno te digibulu kantri Kusba sela şawani we bidi dabe, me gasa meba kantriba tagala palali, te we bidi augwaligo ena ofa dabe yabo nai sesaibao. <sup>11</sup>Eno ede bidibo we bidi, te mu tama dao, dagego eno po mu tama sela şawai dao. Tiali goli, eno te şę dabe pedelemainu ebo sogo da, teda dagego duga yali kolesagade hale me egobeo dao. Magi baso meni. Eno dagego te bidi dabe augwali te hamaga elama, gagea peyu yali bidi dabe sela şawaibao. Tama dage Jerusalemde eno bulu dude bidaibao. Tama dagego tede ena dali hamaga ma eyu egobeo. <sup>12</sup>Tama te we bidi augwali eno Jerusalemde bidimainu sula tagalaibao. Augwaligo nai dabe hauwa meniama, tama augwaligo augwa aiyaba elaluama elaluaibao. Tama augwali enaba aselama, tama augwali tau somainu enabolo hanalu waibao. <sup>13</sup>Te Israel hani dwasianu augwali me bidibao, augwaligo gasa bidi dabe dali dwai kolesaga me egobeo. Tama augwaligo ili po olama, tama augwa abagi dabe ili po wabo şę me egobeo. Te augwali wiegila bidibo şę naga elaluaibao. Tama augwali wi ilabo bidi meni yaibao,” Genuai Bidigo te po wai.<sup>h</sup>

### Wiegi yai homu pemene ebo balia po me deli

<sup>14</sup> Dage Israel dabe, dage i olama,

---

<sup>h</sup> 3:13 Ped 14:5

- homu pemene ebo balia po waiào.  
 Dage Saionde bidibo bage, dwagi yai homu eyu,  
 teşabi po waiào.  
 Dage Jerusalem dabe, dage wiegi yai homu elama,  
 homu pemene geninama mu iyào.
- 15 Magi baso meni.  
 Genuai Bidigo te po wai dao,  
 agai dage dene mawaibao po wai dao,  
 tiali goli megı da, dagego dene sabo usu eyu silama,  
 agai te po tagalali dao.  
 Agai dagego boi bidi dabe sese sela şawani dao.  
 Genuai Bidi da, aga Israel dabego king dao,  
 tama aga dage dali bidibao.  
 Tialima, dage nai me delide munu ma wi igimio.
- 16 Nosali bubuga me deli pedelaibao,  
 tama te bubugade augwaligo Jerusalem dabe  
 te tama po waibao,  
 “Dage Jerusalem we bidi dabe,  
 magi naide wi me elamo dao,  
 tama dage olo dali noma sigio.
- 17 God, duga Genuai Bidi, aga dage dali bidibao.  
 Agai bomogo dage tau selama,  
 tama dagego te boide dagego tobolu ela holali dao.  
 Genuai Bidi aga dagede wiegi yai homu pemene elama,  
 tama balia po waibao,  
 te we bidigo lotu wabo genuai sogo ebo tiwai yaibao.  
 Agai dage godolo mu ebao,  
 tama agai po deli me wagobeo,”  
 augwaligo te tobage po waibao.
- 18 Genuai Bidigo po genina ma weyu, e tama po wali,  
 “Eno dage Jerusalem dabe dene mawai dao,  
 tama dagego te nai da tuyu lotu wabo genuai sogo  
 te kolesaga dabe wali me pabo usu me ebeo.  
 Dagego enabolo te haniani moni da tubo dali lotu po  
 wabo sogo ebo kolesaga ebo usu me ebeo.  
 Tama te tialigo dage hale geninama mu emainu ilalio.  
 Tiali goli megı da, dagego hale eno silaibao.
- 19 Suao, te sogo bubugade eno dage dali dwai şe elama,  
 dage aiyaba elaluali te boi bidi dabe dene mawaibao.  
 Dage meba Israel dabe gasa kantri dabeba  
 subigila pelama, tama gasa kantride bidibao,  
 te sipsip kibu hani subigila pelama,

augwaligo şaęa dola tagalali bage  
 tiwai yali gilama yali da.  
 Tiali goli, eno augwali duga bulu tþba mu  
 ma odasa asaibao.  
 Megi da, dage meba hanigo gedude te hale mu te ebao.  
 Tiali goli, eno te hale silama,  
 tama dagebolo genuai nogi mawaibao.  
 Tama digibulu tþ we bidigo dagego nogi ugwaba saibao.  
<sup>20</sup> Te asobo bubugade,  
 eno dage te tigidali pesagede bidalubo te pesagede  
 ma oda saibao,  
 tama eno dage duga bulu muba ma odasa asaibao.  
 Tama me eno dage genuai nogi menama,  
 tama tigidali tþde we bidigo dagego nogi ugwaba  
 saibao. Tama te sogo eno dagego şę wiegi yai  
 pedelemainu ilama,  
 tama dage wiegila bidibo elaluaibao.  
 Dagego te şę pedelebo te duga gedugo mu sueibao.  
 Ena Genuai Bidi, eno po polo walio,” tama wali.